

La nestre Regjon protagoniste in Europe

NPLD: lis lenghis minoritariis a fasin rêt

Il *Network to promote linguistic diversity* – NPLD al è l’organisim cun sede a Bruxelles, atif intal setôr de politiche e de planificazion linguistiche, costituit di diviers ents regionai e statâi europeans che a àn sul lôr teritori lenghis minoritariis o ben che a lavorin intal setôr dal multilinguism. O vin domandât a William Cisilino, diretôr de Agjenzie Regjonâl pe Lenghe Furlane, di spiegânus alc di plui sul *Network* e su la sô colaborazion cu la nestre Regjon.

Cisilino, cuant aie tacât a fâ part dal NPLD la Regjon Friûl-Vignesie Julie?

“Il nestri Consei regjonâl al è jentrât tal NPLD zaromai tal mê di Lui dal 2014, e al è une des pocjis assembleis legislativis che a son componentis dal *Network*.”

Chest al marche la atenzion de amministrazion regjonâl pes lenghis minoritariis. Il rûl operatîf di gjestion, organizazion e supuart ae Regjon intes ativitâts dal NPLD i è stât dât ae ARLeF, che intai agns e à cjapât part in maniere simpri plui ative aes iniziativis organizadis dal *Network* in Europe”.

Parcè isal nassût l’NPLD e cuâi sono i siei obietifs principai?

“La rêt, cofinanziade de Comission europeane, e je stade create par sostignî, tutelâ e promovî lis lenghis minoritariis e regjonâls a nivel european midiant dal scambi di buinis praticis e di informazions tra i esperts dal setôr. L’obietif primari di NPLD al è chel di incressi la cussience, a nivel internazionâl, su la impuartance de diversitât linguistiche, valorizante tant che oportunitât e strument clâf pal svilup personâl, sociâl e economic de Europe e dai siei citadins, dongje di chel di favorî il dialic interculturâl tra i citadins europeans”.



William Cisilino (tierç, di çampe) intant de reunion de Assemblee gjenerâl dal NPLD a Valencia

In sumis: un lûc dulà incuintrâsi fra minorancis e condividi oportunitâts e problemis.

“Sigûr. Un obietif impuartant de rêt al è ancje chel di favorî la condivizion di buinis praticis tra decisôrs politics, esperts e ricercjadôrs dal setôr. Chest si lu fâs organizant grups di lavôr par definî azions politicis, progjets comuns e colaborazions saldîs tra i components. Il *Network* al è diventât, cun di plui, la vôs des comunitâts linguisticis che lu componin, no dome a Bruxelles, ma ancje tes capitâls dai Stâts dulà che lis minorancis a vivin”.

L’NPLD al da vôs a un grant numar di lenghis. Cualis sono?

“Il *Network* al rapresente sedi lenghis uficiâls de Union europeane, tant che irlandês, svedês o finlandês; sedi chês cun *status* uficiâl intai lôr teritoris, tant che basc, catalan, galizian, galês; sedi lenghis ricognossudis, ma no dal

dut uficiâls, tant che furlan, breton, cors, ocitan, cornic o sami”.

Puedial dînus, in struc, cualis che a son lis ativitâts che al fâs l’NPLD a Bruxelles?

“Inte pratiche, NPLD al fâs une ativitât di lobbying li des istituzions europeanis. Cheste azion si tradûs tal meti in evidence lis cuistions linguisticis li dal Parlament european, de Comission e dal Consei european. Al vûl dî ancje inzornâ lis istituzions europeanis su lis politicis linguisticis che a integnin lis lenghis regjonâls e minoritariis e domandâ une poie plui fuerte des istituzions ae cuistion dal multilinguism, cuntun voli di rivuart a lis lenghis plui debilis”.

Par vê plui informazions si pues cjalâ il sît www.npld.eu o la pagine Facebook dedicate “NPLDeu”.

Udin al ospitarà la Summer University dal Network

Ai 13 e ai 14 di Setembar dal 2018 Udin al sarà la capitâl des politicis linguisticis europeanis. La sinergie jenfri Agjenzie Regjonâl pe Lenghe Furlane e il *Network to promote linguistic diversity*, cun di fat, e puartarà in citât il prin incuintri de *Summer University*, il gnûf progjet targât NPLD.

E sarà une oportunitât uniche pe nestre Regjon, dal moment che si screarà propit achi la *Summer University* che l’NPLD al à decidût di inviâ tacant cun chest an. Il Friûl al ospitarà i docents plui impuartants e i esperts a nivel mondiâl su lis politicis linguisticis. L’event formatîf al è indreçât ai components dal *Network*, che a rapresentin cuasi vincj guviers regjonai e statâi europeans li che a son presintis minorancis linguisticis. La iniziative e à vût il patrocini e il finanziament de Fondazion Coppieters di Bruxelles, specializade in federalisim e politicis linguisticis, e e viodarà la partecipazion di rapresentants dal Consei de Europe e de Comission europeane. Graciis ae colaborazion cu la Universitât dal Friûl, i incuintris si davuelzaran inte sede de Scuele Superiôr, dentri dal prestigjôs Palaç dal Sietcent Toppo Wassermann.

I components dal *Network* a varan maniere di cognossi Udin e il Friûl intai lôr diviers aspjets, ancje chel enogastronomic: l’event, cun di fat, si davuelzarà intai stes dîs di Friuli Doc, vetrine principâl des ecelencis agroalimentârs de nestre regjon.

